

आकाशवाणी

खबरां पूनम डोगरा कोला

1. भारत ते कनाडा राश्ट्री सुरक्षा कनून प्रवर्तन ते साइबर सुरक्षा उप्पर सहयोग गी मजबूत करने उप्पर सहमत होए।
2. जपान दी प्रधानमंत्री सनाए ताकाइची दे सतारूढ गठबंधन नै चानचक्क होए दे संसदीय चुनाएं च ऐतिहासिक जित दर्ज कीती। प्रधानमंत्री नरेंद्र मोदी होरें ताकाइची हुंदी शानदार जित उप्पर उनेंगी बधाई दिती।
3. प्रधानमंत्री नरेंद्र मोदी होर नमीं दिल्ली च सेशेल्स दे राश्ट्रपति डॉ. पेट्रिक हर्मिनी हुंदे कन्नै गल्लबात करडन।
4. तेजस्विन शंकर होरें एशियाई इंडो चैंपियनशिप च मर्दे दे हेप्टाथलॉन च सुन्ने दा तगमा जितेआ।
5. टेनिस च भारत नै बैंगलुरु च नीदरलैंड उपर शानदार 3-2 दी जित कन्नै डेविस कप क्वालीफायर दे दुए गेड़ च अपनी थाहर पक्की करी लैती ऐ।

<><><><><><>

NSA-Canada

भारत ते कनाडा राश्ट्री सुरक्षा ते कनून प्रवर्तन दे मुद्दे उप्पर सहयोग लेई इक सांझीप कार्य योजना तैयार करने उप्पर सहमत होई गए न। एह फ़ैसला शनिवार गी ओटावा च राश्ट्री सुरक्षा सलाहार अजीत डोभाल ते कनाडा दी राश्ट्री सुरक्षा सलाहकार नताली ड्रोइन हुंदे बशकार होई दी बैठक च लैता गेआ। विदेश मंत्रालय नै आखेआ ऐ जे दवे मुख्य सुरक्षा ते कनून प्रवर्तन संपर्क अधिकारी नियुक्त करडन ते उंदी सरंबधत एजेंसियां कार्य सरबंधें गी मजबूत करडन। दवे पक्षें साइबर सुरक्षा नीति ते साइबर सुरक्षा मुद्दे पर सूचना सांझा करने च सहयोग उप्पर चर्चा जारी रखने उप्पर प्रतिबद्धता जताई।

<><><><><><>

Japan

जपान दी प्रधानमंत्री सनाए ताकाइची हुंदे नेतृत्व आहले सतारूढ गठबंधन नै कल होए दे चानचक्क संसदीय चुनाएं च ऐतिहासिक जित दर्ज कीती ऐ जेहदे कन्नै करे च कमी ते रक्षा प्रणाली गी तगड़ा करने दे वादे पूरे होने दा रस्ता खुल्ली गेआ ऐ। देश दे सार्वजनिक प्रसारक मुजब सुश्री ताकाइची गी लिबरल डेमोक्रेट पार्टी दे नेतृत्व आहले गठबंधन नै जपान दी प्रतिनिधि सभा दी 465 सीटें शा 352 सीटां जितियां न।

<><><><><><>

PM-Takaichi

प्रधानमंत्री नरेंद्र मोदी होंरे जपान दी प्रधानमंत्री सनाए ताकाइची होंरे गी संसदीय चुनावं च जित उपर बधाई दिती ऐ। सोशल मीडिया पोस्ट च प्रधानमंत्री होंरे आखेआ जे दवेँ मुखेँ बशकार विशेष रणनीतिक सांझेदारी दी वैश्विक शांति, स्थिरता ते समृद्धि गी बढ़ावा देने दी महत्वपूर्ण भूमिका ऐ। मोदी होंरे विश्वास प्रगट कीता जे सुश्री ताकाइची हुंदे सक्षम नेतृत्व शां भारत ते जपान दी मित्रता नमीं उंचाइयेँ तगर पुज्जोग।

<><><><><><>

PM-PPC

प्रधानमंत्री नरेंद्र मोदी होर अज्ज 9 फरवरी गी इस बारे आहले परीक्षा पे चर्चा दी दुई कड़ी च विद्यार्थियेँ कन्ने गल्ल-कत्थ करडन। इस दरान श्री मोदी होर बोर्ड दे म्तेयान देने आहले विद्यार्थियेँ गी म्तेयान दी तैयारी, पढ़ाई दी टेंशन कन्ने निब्वडना ते होर दुइयेँ चुनौतियेँ दे हल बारै सलाह देडन। इस बारी परीक्षा पे चर्चा दे 9में साल 45 मिलियन शा बद्द पंजीकरण होए न। इस बारे दी पहली कड़ी 6 फरवरी गी टेलीकास्ट कीती गई ही। उस कड़ी च प्रधानमंत्री होंरे विद्यार्थियेँ दे नेकेँ सोआलेँ दे जवाब दिते हे। हुन परीक्षा पे चर्चा दा दुआ एपिसोड अज्ज बड्डलेँ 10 बजे रम्भ होग।

<><><><><><>

PM-Talk

प्रधानमंत्री नरेंद्र मोदी होर अज्ज नमीं दिल्ली च सेशेल्स दे राष्ट्रपति पैट्रिक हर्मिनी हुंदे कन्ने गल्लबात करडन। दवेँ नेता आपसी हित दे दपक्खी क्षेत्रीय ते अंतरराष्ट्री मुद्देँ पर चर्चा करडन। राष्ट्रपति हर्मिनी होर अज्ज संझा राष्ट्रपति भवन च राष्ट्रपति द्रौपदी मुर्मू हुंदे कन्ने बी मलाटी करडन। राष्ट्रपति होर भारत दी 5 दिनेँ दी यात्रा उपपर कल नमीं दिल्ली पुज्जे हे। केँद्री मंत्री अनुप्रिया पटेल होंरे ब्हाई अड्डेँ पर उंदा सोआगत कीता। डॉ. हर्मिनी चेन्नई ते मुम्बई च कार्यक्रमेँ च हिस्सा लेने मगरा नमीं दिल्ली पुज्जे।

<><><><><><>

Shah

गृह मंत्री अमित शाह होर अपने त्रे दिनेँ दे छत्तीसगढ़ दौरे दे अखीरी दिन अज्ज जगदलपुर च बस्तर पांडुम उत्सव दे समापन समारोह च मुख्ख परौहने दे रूप च हिस्सा लैडन। बस्तर दी सग्गोसार आदिवासी विरासत गी मनाए जाने आहले इस उत्सव दा उद्घाटन शुक्रवार गी राष्ट्रपति द्रौपदी मुर्मू होंरे कीता हा। बस्तर पांडुम तैहत त्रे दिनेँ तगर संभागीय स्तर दी प्रतियोगिता आयोजित कीतियां जा'रदियां न, जिंदे च बस्तर तगर मंडल दे बक्ख-बक्ख जिले दा प्रतिनिधित्व करने आहले 84 समूहेँ दे 700 शा मते कलाकार अपनियां प्रस्तुतियां देआ'रदे न।

<><><><><><>

ECI

चुनांस आयोग नै स्पष्ट कीता ऐ जे पच्छम बंगाल च मतदाता सूची दी चला'रदी विशेष नजरसानी तैहत मुकामी प्रमाण पत्र मान्य पात्रता दस्तावेजें शा इक ऐ। पच्छम बंगाल दे मुख्ख चुनांस अधिकारी होरें'गी लिखी दी चिट्ठी च आयोग नै गलाया जे पच्छम बंगाल च स्थाई निवास प्रमाण पत्र नवंबर 1999 दे राज्य सरकार दे पत्र ते उंदे मगरा जारी कीते गेदे हुक्में मुजब जारी कीते जंदे न।

<><><><><><>

UPSE-Cal Centre

UPSC नै सिविल सेवा म्तेयान ते भारती विदेश सेवा 2026 दे मेदवारें गी बड्डी राहत दिंदे होई अपने काल सेंटर दिएं सेवाएं दा समां बधाई दिता ऐ। हून मेदवारे हफते दे कुसें बी दिन बडलै कोला लेइयै चिरें रातीं धोड़ी काल सेंटर दिएं सेवाएं दा फैयदा लेई सकदे न। आयोग नै मेदवारें दी सुविधा लेई काल सेंटर च मेदवारें दी मदद करने आहले अमले दी गिनतरी च बी बाददा करने दी घोशणा कीती ऐ। संघ लोक सेवा आयोग दा आखना ऐ जे आवेदन प्रक्रिया दरान मेदवारें गी बेहतर सहायता ते मार्गदर्शन देने दे मकसद कन्नै एह फैसला लैता गेआ ऐ। जानकारी मूजब हून काल सेंटर दी सेवा हफते दे 7एं दिन उपलब्ध होग ते 2 शिफ्टें च कम्म जारी रौहने कारण हून बड्डलै 7 बजे कोला लेइयै रातीं 9 बजे धोड़ी मेदवारें अपनिएं समस्याएं दे नबेड़े लेई काल सेंटर कन्नै संपर्क करी सकडन।

<><><><><><>

Asian-Indoor

चीन दे तियानजिन च आयेजित एशियाई इंडोर एथलेटिक्स चैंपियनशिप च भारत नै 5 मैडल जितियै अपना अभियान समाप्त कीता ते मैडल सूचि च 16मीं थाहर पर रेआ। भारत दे तेजस्विन शंकर नै कल मर्दे दे हेप्ताथलॉन मकाबले च सुन्ने दा मेडकल जितेआ। एह भारत दा इक्कमात्र सुन्ने दा मैडल रेआ। तेजस्विन शंकर नै 5 जहार 993 अंक हासल करियै इक नमां राश्ट्री इंडोर रिकार्ड बनाया जेहड़ा 2021 च अमरीका च बनाए गेदे उन्दे पिछले रिकार्ड 5 जहार 650 अंके कोला मता ऐ। कल खीरी ध्याड़े भारत नै त्रै होर मैडल अपने नां कीते जिंदे च पूजा नै उच्चो छाल च चांदी दा, तजिंदरपाल सिंह तूर नै शॉपपुट च चांदी दा ते एंसी सोजन नै लम्मी छाल च कैह दा तगमा जितेआ। मेजबान चीन नै 10 सुन्ने दे, 11 चांदी दे ते 13 कैह दे तगमे जिते।

<><><><><><>

Tennis

भारत नै डेविस कप टेनिस दे क्वालीफायर दे दुए राउंड च अपनी थाह पक्की करी लेई ऐ। बेंगलुरु च कल भारत नै नीदरलैंड्स गी 3-2 कन्नै हराया। भारत दे दक्षिणेश्वर सुरेश होरें दवें इक्कले-इक्कले मुकाबले जिते ते युकी भांबरी हुंदे कन्नै डबल्स मैच बी अपने नांस कीता। निर्णायक रिवर्स सिंगल्स च सुरेश होरें गाड डी

ओडेन गी 6-4, 7-6 कन्ने हराया। एहदे शा पैहले सुरश ते भांबरी होरें डबल्स च 7-6, 3-6, 7-6 कन्ने जितियै भारत गी 2-1 दी बढ़त दोआई।

<><><><><><>

T-20 World Cup

आई.सी.सी मर्दे दे टी-20 विश्व कप च कल त्रै मैच खेड्डे गए। चेन्नई दे एम.ए चिदंबरम स्टेडियम च ग्रुप डी मैच च न्यूजीलैंड नै अफगानिस्तान गी 5एं विकटें कन्ने हराई दिता। अफगानिस्तान दी टीम नै पैहले बल्लेबाजी करदे होई 20एं ओवरें च 6 विकटें दे नुकसान पर 182 रन बनाए। परते च न्यूजीलैंड दी टीम नै 18में ओवर च 5 विकटें कन्ने जित हासल कीती। इक होर मैच च इंग्लैंड नै नेपाल गी 4 रन्ज कन्ने हराई दिता। पैहले बल्लेबाजी करदे होई इंग्लैंड नै 20 ओवरें च 7 विकटें दे नुकसान पर 184 रन बनाए जेहदे परते च नेपाल दी टीम 20 ओवरें च 6 विकटें दे नुकसान पर 180 रन गै बनाई सकी। त्रिया मैच शामिल कोलम्बो च श्रीलंका ते आयरलैंड बश्कार खेडेआ गेआ जिसे श्रीलंका नै 20 रन कन्ने जिती लैता। श्रीलंका नै पैहले बल्लेबाजी करदे होई 20 ओवरें च 163 रन बनाए जेहदे परते च आयरलैंड दी पूरी टीम नै 19 ओवरें च 163 रन बनाए जेहदे परते च आयरलैंड दी पूरी टीम 19 ओवर ते 5 गेंदें च 143 रन गै बनाई सकी। अज्ज बी 3 मैच खेड्डे जाडन। पैहला मैच 11 बजे स्काटलैंड ते इटली बश्कार, दुआ दिनें 3 बजे ओमान ते जिम्बाबे ते त्रिया शामी 7 बजे कनाडा ते दक्खन अफ्रीका बश्कार खेड्डेआ जाहगा।

<><><><><><>

Read: Poonam Dogra

Stand by: Jagmohan Sharma

D.E.O. : Varinder Kumar

Editor : Abhilasha Sharma